

清·方略館 編

清代 方略 全書

北京圖書館出版社



清代方略全書

八七

清·方略館編

北京圖書館出版社

欽定剿平三省邪匪方略正編卷三百二

壬戌年

六月初二日

辛丑

惠齡奏言

臣

於二十五日自潞

峪起營赴平利紫陽一帶防堵由大峪口入山
查北面峪口之外距省較近牲畜蕃庶地方沃
饒爲從來未經蹂躪之地萬一賊匪被剿緊急
竄出峪口不特完善地方致遭焚掠且該匪得
有貲糧騾馬又可苟延殘喘是以額勒登保逼

賊出林仍止在山內剿辦並非轟出平原

臣移

營之後北面全屬空虛究難放心因札飭沿山

州縣營員加意防堵並將軍撫二標官兵一千

名留駐峪口一帶偵探防堵

臣

僅帶督標兵六

百名前赴陝楚交界商同總兵穆克登布扼要

嚴防查該處惟平利與二竹緊相毗連至紫陽

又在安康之西不與楚省接壤

臣

自應趕赴平

利相機辦理奏入

上命軍機大臣傳諭額勒登保惠齡曰本日保寧由
陝西軍營來京召見據稱額勒登保因剿辦苟逆
日久未能得手甚爲焦急苟逆藏匿老林山險路
仄官兵進剿不能得力自應亟爲設法熟籌妥辦
昨據額勒登保奏欲將賊匪驅逼出山並稱該匪
已無騾馬勢益窮蹙如果逼出老林以馬隊官兵

追剿徒步賊匪豈有轉行落後之理況苟逆股匪
爲數無多官兵不啻十倍於賊何難設法剿捕又
據保寧稱賊匪潛匿深山艱於覓食時於夜間令
其黨夥出山搶掠等語可見賊匪不能久在山內
存住何不伺其出山搶掠時扼要攔截絕其口食
賊匪斷不能枵腹久支勢必全夥出山可期一鼓
殄滅至惠齡係本省總督陝境賊匪係伊任內應

辦之事何得置之事外僅在峪口以防守塞責茲
接伊具奏已赴平利與經畧軍營相距尙不甚遠
自當彼此熟商迅勉奏績或別有所見亦不妨據
實具陳期於辦賊有益毋得心存推諉遷延干咎

初四日

癸卯

德楞泰奏言

臣

移師東趨先剿樊曾

等股途次探報樊曾等逆先於十七日由臺口
向木耳溝金斗坪一路南逃是晚兵抵臺口適

總兵孫清元吉林泰躡蹤前來到營謁見查金
斗坪與向西之烟墩埡張飛埡大小羅溪等處
在在通彎腰樹上龕一帶必須前有堵截尾追
之兵方可得力卽令孫清元吉林泰等帶兵取
道獅子巖趕赴該處確探迎剿臣督兵跟蹤緊
追十八日至金斗坪接准督臣吳熊光來信云
興山白馬灘運河一帶有零匪梗阻商令酌籌

兵力疏通適長齡等帶兵自南漳觀音堂尾追

樊會等逆抄出簡口與臣會晤臣查興山山內

所貯糧石此番大兵往回支放殆盡自應趕緊

補貯以利軍行而長齡一路兵馬現亦無路可

分是以臣會同酌量撥出李天林及副將孫應

奉等所帶兵勇一千八百餘名令其馳赴興山

白馬灘疏通運道並飭令隨時查探東湖歸州

一帶如有零匪遁藏卽當搜捕淨盡嗣聞樊曾

等逆知臣督兵尾追冒雨狂奔向老山箐林翻

越沿途淌渡溪河淹斃及乘間逃出難民不少

又據孫清元吉林泰稟報樊曾等逆於二十日

晚間至仙家坪遂由寒水河翻山該鎮等於二

十一日在獅子巖聞報是夜四鼓冒雨進發趕

至段樹垭西溝一帶賊衆瞥見官兵卽紛紛四

散奔逃副都統銜總管托爾托保侍衛華山保
特克昇額帶領馬隊遊擊烏勒喜訥都司姜元
祥守備張大勲帶領兵勇分路趕追四十餘里
直至梨子坪大雨盆傾兼之山險林密濛霧更
天未能再進計沿途殲斃賊匪一百餘名生擒
活賊三十七名搶獲騾馬刀矛旗幟甚多據獲
犯喬世中供稱這股係樊掌櫃王國賢曾芝秀

三人一營那戴四掌櫃崔胡兩個元帥見大兵
趕得緊在歸州地方帶了他自己的三四百人
進興山老林藏躲我們走到乾溪溝又有姓孫
的頭目帶來二百多人合夥不料官兵趕上被
拏等語訊明後卽行正法其餘難民照例給與
銀米路票釋歸現仍分探賊蹤躡剿又據探報
該逆已遁入扁擔溝有北竄獐洛河之勢查獐

洛河係通竹山官渡大路孫清元等旣已尾追

自無虞其回折

臣

卽取道獅子巖蒙古寺旁出

獐洛河之東面抄截二十五日向高灘河進發

接據色爾滾蒲尙佐稟報自魯家埡追剿蒲添

寶賊股分竄後探得各起分逃之賊又俱合夥

東竄羅溪二十一日官兵冒雨淌過羅溪河至

冷盤埡一帶追及賊尾雨下如注兵勇淋漓無

不切齒痛恨奮勇力剿立斃賊匪百餘名賊衆潰亂奔逃趕殺三十餘里沿途又共斃賊一百二十名先後生擒一百四十七名口滾崖者亦復不少搶獲賊旗鎗矛騾馬無數其所獲各犯因離大營已遠未便解送已訊明吳先光等八十二名均係戰手當卽正法其難民男婦六十五名口一概照例省釋計蒲逆賊股除此次擒

斬並沿途渙散淹斃外所剩不過千人

臣卽飛

飭色爾滾等總須緊追不予以暇如將首夥全

行掃淨不必遠涉來營卽就近在於興山一帶

探剿賴大有卽賴先鋒並崔胡戴兩起零匪

臣

查蒲樊兩股賊衆萬餘自經官兵分路痛剿此

時約計不過剩三千人現在均有勁旅剿辦再

得兩三仗卽可集事惟查自四月二十四日以

後至今月餘陰雨纏綿凡山中小溪流忽漲
忽消賊衆狂奔日行總在百里以外官兵亦不
敢稍予以暇故兩股逆衆情急淌渡均有淹衝
及渙散之事而各營兵勇亦有漂沒者現在後
隊鍋帳半多落後然當此功虧一簣之際又不
敢稍爲鬆勁臣惟有鼓勵將弁兵勇趁此賊勢
衰殘趕緊剪除淨盡廓清楚境再前次色爾滾

等於穆家垵一帶擒獲男婦賊匪解到營次點
查三百零一名口連夜訊明內有探馬頭旗首
潘玉安曹建中等四名及戰手祝必先等一百
三十六名分別臠割正法其餘均係難民照例
安爲遞送歸業

同日吳熊光奏言查樊會各逆聞德楞泰大兵
自西而東遂由間道竄入保康南山度其趨向